

# JA MYI MAJTSKPI NØKY MIDI JA PABLO TYANI GAJX JA CORINTI JAA'Y

Ku ja Pablo tnijayi ja  
janchja'wibi pøn jam Corinto

**1** Øts idø'on Pablo'ajtp. Tø  
øts ja Dios Teety xamidsøky  
jøts ø ngudanit ja Jesucristo.  
Jøts nayide'en ja Timoteo midi  
øts møøt ya'at nøky nja'ay jøts  
øøts ndanigaxi pøn jaty ja Dios  
Teety ja'ajtidip jam Corinti, jøts  
nayide'en pøn jaty jam Acaya etjotp  
tsinaadyip. <sup>2</sup>Paatti kupøjkti ja  
Dios Teety jøts ja nwindson'ajtim  
Jesucristo kyunuu'kxin jøts ja  
jyotkujk'ajtin.

Sa Pablo y'ayo'ombaajty

<sup>3</sup>Tkajxajkyindi ja Dios midi  
tyeety'ajtpy ja nwindson'ajtim  
Jesucristo, jabi jade'enxi dø'on  
ja tyeety'ajtin tyikni gaxi'iky  
ku adøm x'ayo'ijxyindi,  
nijuuni xka'ixmajchindi,  
ejtp xkajpxjot'amøjkandi  
Dios'ajtingøjxp. <sup>4</sup>Ja'agøjxp ja Dios  
xkajpxjot'amøjkandi pøni sa jaty  
nidu'uk nidu'uk n'ayo'ombaajtyindi  
jøts jade'en nnija'wandit sudso  
dø'on ja nmigu'uk nayide'en  
ngajpxjot'amøjkimyandit  
sam ja Dios tø xpudøjkandi.

<sup>5</sup>Nayide'en sam adøm kajaa  
ngu'ayo'ombaajta'andi ja Cristo  
yja', kajats ja nayide'en ja  
jot'amøkpøjkin xmø'øyim. <sup>6</sup>Ixyamts  
øøts nyikjemduñ ja'agøjxp ku  
meets ndukmadøy ja nitsoojkin  
ayuujk jøts ku meets nayide'en  
ngajpxjot'amøjkidi. Ku øøts yø'øbi  
ayo'on ndanaxy, ja Dios øts tø  
xkajpxjot'amøjki. Nayi meets  
m'øy'ajtingøjxp øøts idø'on jade'en  
tø njaty jøts meets nduknijawit sam  
nayide'en ja Dios mbudøkiyidit ku  
nay yø'øbi ayo'on wyinaty xpaatti.  
<sup>7</sup>Njantyimyjöp'ijxy'ajtpy øøts  
idø'on jøts meets nayide'en ja Dios  
myikjotkujk'atyyidit sam øøts, øy  
idø'on nayide'en mja'ayo'ombaatti.

<sup>8</sup>Meets migu'uktøjkti, jade'en  
øøts ndsøky jøts meets waani  
x'ext xnijawit sa øøts idø'on jam  
ja ayo'on nyiknajxy Asia. Yikxon  
øøts møk ja ayo'on jam n'ijxy,  
niti awejxin niti jøp'ejxin øø  
wyinaty nga'ukmøøt'ajtni, niti  
majadaajkints øøts, ja o'jkin  
yjöp'am øøts wyinatyni. <sup>9</sup>Jade'ents  
øøts idø'on ojts jam nnayjawi  
sam ja jaa'dyi pøn ja xyøøw tø  
yiktanimacho'owiñi jøts ja o'jkin  
tpaattit. Øyts idø'on ja ne'egi ku

jade'en yjajty, jabi jaanimxi øts ja Dios idø'on tuki'iyi nmibøkøjxi jøts ku oo'kpibaat ja tyikjujkyiky. Jøts øøts jade'en nja'gyujkiyi'ñ ku adøm niti kø'øm xkama'ayim. <sup>10</sup>Ja' øøts idø'on x'axajtujk x'agø'ødujk jøts øøts jade'en ja o'jkin xkadukpaajty, jøts nayide'en xyiknitso'ok'ejtint ku ja o'jkin wyinaty xmimajada'akwa'añim. <sup>11</sup>Nayide'en meets idø'on ja mdsapkaaky tyumi ja'agøjxpts adøm idø'on ni'amuki ngajxajkindit ja Dios jøts øøts ja pudøjkin xmøy'ett.

**Tigøjxp idø'on ja Pablo øjts  
kyanijkxy Corinto**

<sup>12</sup>Ja'agøjxp øøts n'aaw njoøjt yjotkujk'aty ku øøts nnijawi ku øøts o madsoo øy tsuj tø nyiknaxy ja ndsinaa'yin, niti taay. Tu'ugyi øøts ja Dios ja y'øy'ajtin tø xabudøki, ka'ap øøts ja ngø'øm wijy'ajtin tø myajada'aky. Meets windumxi dø'on øøts ja ndsinaa'yin øy tø nyiknaxy. <sup>13</sup>Jøts nayide'en ja nøky midi meets tø ndanigaxi, niti taay ja tkamøøt'aty, mibøkøxti ja'. <sup>14</sup>N'awijxy'ajtpy øøts ku meets ja njaa'y'ajtin xkupøjkit tuki'iyi sam ixja waani tø xkupø'okwa'andi, jøts jade'en nnadyajotkujk'ajtantit nixem niyām ku wyinaty myeni jadigojk ja nwindson'ajtim Jesucristo.

<sup>15</sup>Ja'ayi ndamøj'ajtpy ku meets idø'on tø xkupøjknì, jøts ø nwa'añ ku meets majtsk ojk n'ats'ejxwa'añ jøts jade'en n'atsyikjotkujk'attit. <sup>16</sup>Ja'agøjxpts ndanibiktaajkiyi'ñ jøts ku øts ya nmiñ Macedonia, myijawyeen meets n'uk'ext jøts jadigojk ku nwimbejtnit. Wanik

meets xpuðøkit jøts øøts nja'tt jam Judea. <sup>17</sup>¿Ka'ap øts idø'on ja ndejint yikxon ndyimdyanibiktaajkiyi'ñ ku øts øjts jam nga'uknøjkxni? ¿Sa tø mwa'andi, jade'en øts idø'on xijy sam muum ja jaa'y ja yja' nugo tyikmajada'aky ku ja nugo t'ukupiky jøts ja ka' t'ukpaduni? <sup>18</sup>Pø ka'axi. Wa'ats ja Dios tñijawi ku ka'ap øts jade'en nugo ndaa'yaty. <sup>19</sup>Jabi ka'axi ja Dios U'nk Jesucristo tyaa'yaty midi øøts ja yja' ngajpxwa'kxøø møøt Silvano jøts Timoteo, ma meets jam. Pyadunguijxy ja y'ayuujk ja', <sup>20</sup>jøts ja' tuki'iyi tmidanaagyøjxp pøni ti jaty ja Dios Teety ñi'adso'owip. Ja'agøjxpxi ja xyøøw ja yikajpxpaaty ku adøm Dios Teety nmøja'wa'am ngunuu'kxyja'wa'am ja myøj'ajtin jøts nwa'añim janch tiigyajpxy idø'on yø', nwindson'ajtim Jesucristo køjxp. <sup>21</sup>Nayi Dios Teetyxi adøm idø'on xukmøøt'ejtindip ja Cristo jøts øøts ja tø xjibiky jøts øøts ja jade'en ngajpxwa'kxit ja yja'. <sup>22</sup>Tø nayide'en ja Espíritu Santo xmø'øyim midi ejxpajt'ajtp ku adøm ja xja'ajtyim, jøts jade'en nnija'windit ku xmøy'ukwa'añindi ja jujky'ajtin midi xemikøjxp'etp. <sup>23</sup>Nija'widyaapy ja Dios ku meets nga'uknøjkxni jade'engøjxp ku meets ka' nyikjotmay'ooktøkiwya'añ ku møk nwindso'ødyit. Pøni ka'ats yjanchjade'eni, pø jats øts idø'on ja Dios kø'øm xiidyu'unt. <sup>24</sup>Ku meets wyinaty nninijkxy, ja xondaajkin ja øy'ajtin meets ndaninøjkxwampy. Ka'ap meets nda'aguwaniwya'añ ja janchja'win pø møkxi meets ja xmøøt'ajtni.

**2** Jabi ja'agøjpxxi meets idø'on tø nga'ukninøjkxni ku meets nugo n'atsyikjotmay'ooktøkit. <sup>2</sup>Ja ku meets n'atsyikjotmadyøkit, çpønts øts idø'on ndajotkujk'atp? ¿Kidi meedsip? Yamts meets wyinaty kø'øm tø nyikjotmadyøki. <sup>3</sup>Patyxi meets tø nnijayi jawyeen jøts jam tuki'iyi xyik'øyidit xyikpaadidit ku øts jam wyinaty nja'aty jøts meets xaxondā'akt. Jabi jade'enxi nwa'añ ku mee mxondakmit ku meets x'ext jøts ku øts jotkujk. <sup>4</sup>Ku meets ja'abi nøky ndanija'yiyii'n, janchjotmay'oo'kp øts wyinaty, ja ya'axyi ja ji'iyi øts idø'on wyinaty xmimajadək ku meets yjawi ja jaa'y myikw inmaa'nmya'atwa'añidi jøts ø xkagupøktit. Ka' meets nayide'en nyikjotmay'ookwa'añ, ja'axi øts idø'on nanky'ejxwajniç mabaat meets idø'on ndsøky nba'ayøy, patyxi meets idø'on ngajpxwiyj.

### Jade'en pyaat'atyj jøts

#### yikmaa'kxukt pøn tø tyundigøy

<sup>5</sup>Ja jaa'yu'nk pøn øts idø'on tø x'ukyikjotmadyøki ka'ap øts ja nadyu'uk tø xyik'ayøy jabi nixem niyamxi meets idø'on ndejint winaagin tø mbaajtmiyidi nayja'abi jotmay. Ka'ap ø nwa'añ ku nijum. <sup>6</sup>Ka'ap øts ja møk n'ukwindsø'øwyani pøn idø'on tø tyundigøy. Jabi tøxi meets ja nijum ne'egi kø'øm xkastigimøøni. <sup>7</sup>Jade'en idø'on ne'egi pyaat'atyj jøts meets ja xmaa'kxujkniç, kajpxjot'amøkidi, ja kuts ja jotmay myimajadəkniyit jøts jade'en ja chinaa'yin tyikwindigøøni. <sup>8</sup>Paty meets ixyam ja may'ajt

n'amidøy jøts jadigojk ja tsojkin ja pa'ayo'owin xmo'odit. <sup>9</sup>Tø meets ya'atpi kajpxy ya'atpi ayuujk jawyeen ndanijayi ja'agøjpx jøts ø n'ext nnijawit pøni xjanch'ukpaduujnidip øts idø'on ja ngutujk. <sup>10</sup>Paty xnijawidit, pøni pøn meets mmee'kxpy, nayide'ents øts ja maa'kxin ja nmøømyi. Pøni tø øts idø'on tigati nmee'kxy, ja'agøjpxts øts jade'en tø nduñ ku mee n'ayo'ixy, y'ijxpy ñija'wip ja Cristo. <sup>11</sup>Jøts jade'en o tigati tkadamøj'att ja miku'windsøn Satanás, jabi nnija'wampxi adøm wa'ats ku ja o tigati tamibøki tami'ejxi.

### Ku ja Pablo ttajotmay'øøky ja Tito jam Troas

<sup>12</sup>Ku nja'jty jam Troas jam kajpjotp, nugo øts ndunk jam tyimy'ity øy madsoo jøts øts ja Cristo yja' ngajpxwa'kxiti. <sup>13</sup>Yamts øts wyinaty tø nja'uktundsoo'mi, kumi ka'ats øts øy njotkujk'aty ja'agøjpx ku øts ja Tito jam ngapaajty, adøm ja nmigu'uk, patyts øts jam øjts ndso'ongojmi jøts øts ojts nnøjxni jam Macedonia.

### Ku ja Cristo møøt nmajadək'ijtyindi

<sup>14</sup>Nmøja'wimp ngunuu'kxyja'wimp ja Dios Teety ku ja ejtp xyikmajadaajkyi tu'ugyi møøt ja Cristo, jøts ja kyajpxy jøts ja y'ayuujk ja xukajpxwa'kxyim øy magama. <sup>15</sup>Y'øyja'wip chuja'wip ja Dios Teety pøn ja Cristo møøt y'ity jøts ja yja' tkajpxwa'kxi. <sup>16</sup>Øy ja magama ja y'ixpøjkin wyidity jam muum tkamibøkti, øjkin tigø'øyin ja yiktatiidyu'undip.

Jøts muum tjanchjawidi, ja'ats ja tyajuky'attip xemikøjxp. ¿Pønts idø'on yø'øbi tunk nugo niyjøjxk tyimy'ukniyjajtp? <sup>17</sup> Jabi ka'axi øøts ja nugo ndameembyiky ku øøts ja Dios kyajpxy ngajpxwa'kxi sam muum y'adø'øtsti, uk ka'baat ka'pxy tniğajpxti tum wimbet ja tniğadya'akti. Ka'ats øøts jade'en n'adi'ich, tiy janch øøts ja nniğajpxy pø tøxi øøts Dios kø'øm xkexy jøts øøts kyajpxy ja ngajpxwa'kxit Cristo pyudøjkingøjxp øy mađsoo jam Dios wyingujkp.

**Ku ja Dios ja chojkin ja  
pya'ayo'owin jadigojk  
tyiktso'ondaajky Jesucristo køjxp**

**3** ¿Sa meets idø'on yø xja'gyuki ku øøts jade'en nwa'añ? ¿Kø'øm øøts idø'on xijy nnagyaxa'akwa'añi sam ja muum ma ttundi pøn ja ixpøjkin wenk tyajktip? ¿Ja exjpajtin øts idø'on kuwani ndyimyøøt'atp jøts meets yø n'ixpøjkin xmibøkit? <sup>2</sup> Ka' yjade'eni, jabi meestsxi myikniğaxi'kpy pøni sa øts idø'on ja ndunkjøøjp y'øyi. Jade'en ja ñiğaxi'iky ku meets ja Dios yja' tø xmibøjki jøts øy ja pøn t'ext tniğawit sa dø'on ja mdsinaa'yin tø tyiğatsti. <sup>3</sup> Kø'ømxi ja Cristo jade'en tø mdanibiktaagiyidi jøts m'ejxpajt'attit jøts øts ja ndunk jade'en wyingaxi'iky. Jabi Diosxi dø'on kø'øm ja y'Espíritu Santo tø tyaky jøts ja y'ejxpajt'att ja'agøjxpts ja' kyakudigøy. Jawaani møj ja', midi anmija'winjotp ja Dios pyiktakpy jøts ka'ap ne'egi ja jawyeembi kutujk midi Moisés kyøxaay tsaağøjxp.

<sup>4</sup> Sa jaty øø nwa'añ tiy yø' janch yø', wa'ats øøts nniğawi jøts ku øøts ja Dios Teety pyudøjkin amuum xmø'øy Cristo køjxp. <sup>5</sup> Ka'ap øøts kø'øm nnankmyajada'agiya, ja Dios wyingujkpxi dø'on chøøñ ja møk'ajtin jøts øøts ja øybi ndu'unt. <sup>6</sup> Jaa ku øøts ja jeexyip tø xkamø'øy ja møk'ajtin sudsots øøts idø'on jeexyip nniğajpxy sa ja Dios chojkin ja pya'ayo'owin jadigojk tñanky'ijxyi sa ja naξwii'ñit jaa'y ñitso'ok'attit. Ka'ap ja tsinaa'yin yikpaaty ku nbadungøjxint tuki'iya ja Moisés kyutujk, ja Espíritu Santoxi dø'on tñanky'ejxip ja øgyajpxy ja ømyadya'aky sudso yikpaaty ja juky'ajtin xemikøjxp. Ja o'jkin tigø'øyin pyatpy ja anmija'win ku ja Moisés kyutujk ngabadungøjxint yam ja Espíritu Santo yja' tyumyikjuky'aty.

<sup>7</sup> Jade'en idø'on ja Moisés kyutujk ja myøj'ajtin kyaxi'iky midi tsaagøjxp yikjaay ku jaaju'uk agujkp yikmøøy, janch tøø'kxp tsamamp idø'on ja wyeen y'aaw. Jøts janch win'oo'ktip idø'on ja myigugajp israelit jaa'y ku ja yjayik'ejxwa'añ. Waani dø'on ja y'aju'uk møj y'atskaxi'iky, pojn ja ñaxkojmi. Sats idø'on ja janchtyimøy y'atsmiñ ja'abi kutujk midi anmija'win ja o'jkin tyukupiky'ajtpy. <sup>8</sup> Kuts ja øgyajpxy ja ømyadya'aky ka'ap ja tmi'abaaty, pø ka'axi ja winmaa'ñ myajada'aky mabaat ja yja'aty ja myøj'ajtin ja y'øy'ajtin midi ja Espíritu Santo xuk'ejximp xukniğa'wimp. <sup>9</sup> Sats idø'on ja kutujk janch møj, yam ja tjayikudigøy ja anmija'win, isudsots idø'on ja Dios

y'øgyajpxy y'ømyadya'aky jawaani kyidyimy'ukmøjit midi adøm ja xagupøjkimp! <sup>10</sup>Jabi ka'axi ja Moisés kyutujk møøt ñabyaadyi ja Dios y'øgyajpxy. <sup>11</sup>Øyi dø'on ja kutujk møj tø yjamiñ ka'ap ja Dios y'øgyajpxy ja twinajxi midi ejtp xemikøjxp.

<sup>12</sup>Ja'agøjxp øøts ja njøp'ijxy'aty, paty øøts agujk jotkujk ja Dios yja' nnigajpxiyi, <sup>13</sup>jøts ka'ap y'ukpaat'ajtniyi jøts øøts ndu'unt nayide'en sam ja Moisés ttuuñ ku ja y'ijty ñawyinjuuxyiyi jøts jade'en ja myigugajp tka'ejxtit ku ja y'aju'uk tuda'aky tyigøøñi. <sup>14</sup>Ja israelit jaa'y ka'ap ja tja'gyukidi tigøjxp idø'on ja Dios ttanibiktaagi ja kutujk midi ja Moisés yikmøøy. Ni ixymbaat ja tkaja'gyukidinim ku ja Dios ñøky tkajpxidi. Jaanim ja ja'gyukin ja tpaattit ku ja Cristo yja' tkupøjkidit. <sup>15</sup>Yjaakjakajpxidibimts ja Moisés kyutujk ja'adi, jade'en ja tjøp'ejxti jøts ja ñitso'ok'attit ku ja tpadungøxtit. <sup>16</sup>Kuuyidsik øy pøngapøn tkupøktit ja nwindson'ajtim Jesucristo jatyits ja pyøky ja ñiwa'adsidit jøts ja wa'ats tuki'iyi tja'gyukigyøxtit. <sup>17</sup>Ja nwindson'ajtimxi tmøøt'ajtp ja jujky'ajtin jøts ja ja'gyukin, pønts ja nwindson'ajtim tjanchja'widip ka'ap ja Moisés kyutujk ja y'ukmimajadakniyidit, ni kya'ukjujky'ajtnidit ja pøky agujkpy. <sup>18</sup>Paty adøm ja ja'gyukin nmøøt'ajtna'andi ku ja nwindson'ajtim yikmibiky. Kuts ja ejtp njotmay'ajtindit ja y'øy'ajtin ja myøj'ajtin, nay ja'ats nanky'ejaxmp xjats adøm jade'en njajtnant sam ja

nwindson'ajtim. Yjujky'ajtingøjxp idø'on ja jade'en xpudøjka'am.

**4** Paty øøts idø'on niyuuni ngadawindsuuñ ja ndunkjøøjp midi øøts ja Dios y'øy'ajtingøjxp tø xanibiktaagi. <sup>2</sup>Jagam jixkø'øm øøts idø'on nbikta'aky midi amaa'tsk midi tsø'ødyuñim yiktump. Ka'ap øøts n'ijxy ngøy jøts o pøngapøn nwinday'att. Ni ja Dios øøts ja y'ayuujk ngakajpxma'jti. Ja tyiiby ja yjanchpi øøts idø'on ja'ayi nnigajpxpy, jøts jade'en nipøn jaa'y kyawa'ant jam Dios wyingujk ku øøts n'ayuujk kyatiyi. <sup>3</sup>Ku jaa winaagindi pøn tkaja'gyukidip ja nitsoojkin ayuujk midi øø ngajpxwa'kxpy, ja kyudigø'øyin idø'on ja kø'øm y'ixaawyandip. <sup>4</sup>Ku ja wyinaty kø'øm tkajanchjawidi, ja miku'windsønts idø'on ja tø yikwinajpniyidi pøn ja'ayi ya naxwiñ ne'egi diosja'widip, jøts jade'en tkapaattit ja kudøø'kxaagi ja kujajtaagi midi yajkpy ja øgyajpxy ja ømyadya'aky ku ja Cristo y'øy'ajtin myøj'ajtin yiknimadya'aky. Ja Cristots tnanky'ejaxip ja Dios Teety pøn y'agojnax'ajtpy. <sup>5</sup>Ku øøts ngajpxwa'kxy ka'ap øøts ngø'øm ja' nnigajpxy, ja Jesucristoxi øøts ja wyindsøn'ajtin ngajpxwa'kxip, jøts øøts jade'en nyikwimbejtnit ja y'øy'ajtin midi tø tyaky, ku meets nbudøki ja' chojkingøjxp. <sup>6</sup>Jabi nay ja'abi Dios Teetyxi dø'on midi ja jaj ja tøø'kx tyiktso'ondaajk, nay ja' adøm tø xmø'øyindi ja kujajtaagi ja kudøø'kxaagi jøts n'ejaxindit nnija'windit sa dø'on ja y'øy'ajtin myøji midi ja Jesucristo ñanky'ejaxip.

**Janchja'wingøjxp ja  
tsinaa'yin nyiknaxyim**

<sup>7</sup>Dios wyingujkp ja chøøn ja'abi kujaj'ajtin kudøø'kx'ajtin midin windem xøow tkamøøt'ajtp ja kudigø'øyin, ja' øøts nmøøt'ajtpy njujuky'ajtingøjxp. Ka'ap øøts ngø'øm møk'ajtin nyiktuñ, ja Diosxi myøk'ajtin idø'øn jade'en tyiknigaxø'jkp. <sup>8</sup>Øy øøts tsep agujkp aki agujkp ja njujuky'ajtin yjanaxy, niwindem xøow øøts ja nnøø' ja nduu' kya'aduky; øy øø njamay njatajy sudso øø nyiknaxt, nbatpy øøts ja winmaa'ñ sudso tyuu'baat tyuu'wetst. <sup>9</sup>Øy øø njayikjemduñ njayikteduñ, ka'ap øøts ja Dios x'ixmach; øy øøts ja nmidsep xjatekpya'an'atwa'añ, ka'ap øøts ja tu'ugyi xmimajada'aky. <sup>10</sup>Winjaa windsojk øøts ja jaa'y ja o'jkin xjadukpaatwa'añ sam ja Jesús yjaty. Nay ja'ayi øø kø'øm xpudøjkp jøts jade'en tyiknigaxi'iky ku ja ya xemikøjxp yjuky'aty. <sup>11</sup>Pøn jaty øøts møøt nbaduñ ja Jesús yja', nay ja'agøjxp øøts ja o'jkin jabom jabom x'ijxy xkøy, ja'agøjxp øøts ja xka'ixmach jøts jade'en tyiknigaxø'økt ja yjuky'ajtin øøts nnikøjxp. <sup>12</sup>Øy øøts ja o'jkin xumijapaatwan'ity xumijamimajada'akwan'ity, ja xemikøjxpit jujuky'ajtin meets ne'egi mbaajtip m'ejxip.

<sup>13</sup>Njanchja'wip øøts nayide'en ku yide'en wyā'añ ja Salmos nøky: "Paty ø nnigajpxy ku njanchjawī."

<sup>14</sup>Nnija'wip øøts ku ja Dios Teety tyikjupkyijky ja Jesús, nayide'ents adøm ja møøt xyikjukpyøjkint, jøts jam nnøjkxint niduki'iyyi ja'

wyingujkp. <sup>15</sup>Midi øø tø ngu'ayowi ja'agøjxp øøts idø'øn ja ngupiky jøts meets ja øy'ajtin xpaatt, mayts ja jaa'y Cristo køjxp tpaattit ja Dios kyunuu'kxin ja Dios y'øy'ajtin jøts may nayide'en pøn ttukmøjawidip pøn ttukunuu'kxyjawidip ja Dios ja'agøjxp ku ja tkajxa'akti.

<sup>16</sup>Ja'agøjxp øøts idø'øn ngadawindsuñ. Øy øøts ja nne'kx yjaga'ukmajada'kni, møwenip kajaajip øøts ja njanchja'win jabom jabom. <sup>17</sup>Yø ya'it ayo'on waani yø ñaxkøjy, ka'ap yø jeky tyaa'ni; jøts yø' øy'ajtin xemikøjxp ne'egi xukpaajimp mā ja Dios. <sup>18</sup>Jabi ka'axi yik'ixa'ay midi ya naxwiin yik'ejxp, ja Dios y'øy'ajtin ne'egi yik'ixaapy midi kagaxø'kp. Ja pikta'aky midi kaxø'kp myøøt'ajtpy ja' ja kudigø'øyin. Ja øy'ajtin midi kayik'ejxp ka'ap ja y'aats ja kyojpk ja kyudigøy.

**5** Nnija'windip adøm ku ja nne'kx kyudigø'øyim midi kajajkp sam tu'uk ja tøjkyudigøy naxwiin, jap adøm ja Dios tø xadanibiktaajkindi tu'uk ja tsinaadyaajk tsajpjøtpy. Etp ja xemikøjxp, jabi kidi naxwiin'it jaa'yipxi ja tø tyik'øyi. <sup>2</sup>Janch jade'en idø'øn yjaty ku adøm nne'kx ja yjuky'ajtin tyiknaxy ya, ka'ap adøm n'øyja'wam, winjaa windsojk adøm nnøjkxwa'añim mā ja tsinaadyaajk ja Dios tø xadanibiktaajka'am, <sup>3</sup>mā adøm n'anmija'win yiknitanaa'yim. <sup>4</sup>Yø ne'kx midi nmijujuky'ajtyindip ya naxwiin ka'ap yø øy ti xuk'øyja'wam, jøts yiktsojkp ja tsinaadyaajk midi ja Dios tø xanibiktaajkindi, yjagayikwa'añ

ja o'jkin. Yø naxwii'ñit tsinaa'yin adøm idø'øn njadayiktigatswa'añimp ja jemchinaa'yin. <sup>5</sup>Ja Dios idø'øn kø'øm tø xanibiktaajkindi jøts tø xuktatøjkindi ja Espíritu Santo midi ejxpajt'ajtp ku adøm ja nyikmø'øyindit midi ja yik'awijxpy.

<sup>6</sup>Jade'ents adøm idø'øn ndajotkujky'ajtint, jøts nnija'windip ku ya yø nne'kx nmijujky'ajtyindinim ka'ap adøm ja tsinaadyaajk nbaajtyindinim. Ka'aním adøm idø'øn ndyimyja'atyim ma dø'øn ja nwindson'ajtim jam.

<sup>7</sup>Janchja'wingøjxp adøm idø'øn nmøøt'ajtindit ja jøp'ejxin øy ja njaga'ijxyindi. <sup>8</sup>Ka'ap ja o'jkin tigø'øyin ndsø'jkandit. Jotkujk idø'øn adøm njøp'ejxindit ja o'jkin ku wyinaty xpaat'ajtyindi jøts nnøjkxindit jap ma ja nwindson'ajtim møøt n'ejtint.

<sup>9</sup>Paty adøm idø'øn øy maðsoo nwindson'jka'ant ja nwindson'ajtim wan ne'kxkøjxp wan anmija'wingøjxp. <sup>10</sup>Jabi kuwanixi ja Cristo tyiidyu'unt jøts jade'en nyikmø'øyindit midi xpaat'ajtindip nidu'uk nidu'uk pøni sa wyinaty ja njujky'ajtin ya tø nyiknaxjyindi.

**Ja kajpxy ja madya'aky midi ñigajpxy sa jadigojk møøt nnamyajyint ja Dios**

<sup>11</sup>Ja'agøjxp ku øø nnijawi sa ja nwindson'ajtim yikmøjawit yikunuu'kxyjawit y'ø'y'ajtingøjxp paty øøts ja jaa'y ndukja'gyukiwyanguixy ku øøts tiy janch ja kyajpxy ja y'ayuujk nnigajpxiyi. Nija'wip ja Dios

sa øøts ja njaa'y'aty, njøp'ijxpy øøts jøts meets nayide'en xja'gyukit. <sup>12</sup>Ka'ap øø kø'øm nnay'agajpxiyi, ja ja'gyukinxí meets idø'øn ndukmøøt'atwampy jøts jotkuk mnayjawiýidit ku meets ngawindaayi. Jøts jade'en agujk jotkujk x'adsojimbettit ja jaa'y pøn y'anmija'win yjamøøt'ajtpy. <sup>13</sup>Pøni nugo øøts ndyimgyajpxy pøni nugo øøts ndyimy'adi'ich, Dios ja tu'ugyi tnija'wip; pøni øyts, pøni tiyts, pøni ka'px øø nnigajpxy ja yja', meets ja mda'øy'atp. <sup>14</sup>Ja Cristo chojkingøjxp pya'ayo'owingøjxp øøts idø'øn ja ndunk ngamajststu'uty jaa ku øøts ndyimyjanchjawi ku niduki'iyi tø xku'o'jkindi jøts ka' n'uknijujky'ajtna'ant ja pøky. <sup>15</sup>Paty ja Cristo tø xku'o'jkindi jøts pøn jujky'ajttip ka'ap ja kø'øm t'ukjø'ømit'ajtni ja chinaa'yin, ja Cristo ja ñijujky'ajtnidip pøn ja ojts kyujjky'økiyidi jadigojk. <sup>16</sup>Paty øøts jade'en nga'uk'abaxni pøni sa nidu'uk nidu'uk ja chinaa'yin tyiknaxy; Cristo paat øøts y'ijty n'abexy midi øø nga'øyja'wip ja yja', ixyam ka'ap øøts ja'abi winmaa'ñ n'ukyiktuni. <sup>17</sup>Jade'ents idø'øn, pøn ja Cristo møøt y'ity, jemyjaa'y ja'; ja tigøy winmaa'ñ midi y'ijty nmøøt'ajtyindip ka'ap ja y'uktuni, tum ja yjembyi dø'øn tø nbabøjknandi. <sup>18</sup>Kyø'ømdunkjøøjp ja Dios Teety jade'en tyumpy Cristo køjxp jøts ja møøt nnamyajya'ant. Jøts øøts ja ndunk tø xmø'øy ku niduki'iyi ja jaa'y ja Dios møøt ñamyaa'ñiyit. <sup>19</sup>Yide'en idø'øn nbiktaajkint, ja Cristo køjxp idø'øn ja Dios Teety niduki'iyi ja naxwii'ñit jaa'y møøt ñamyaa'wya'aniyi. Ka'ap

ja pøky tmøjpikta'aky. Jøts øøts xanipijky ya'atpi øy'ajtin. <sup>20</sup>Paty meets xnijawit ku øøts ja Cristo xyikugajpxy'aty, sam idø'on ja Dios Teety kø'øm jeexyip meets mminuu'kxa'agyiyi. Paty øøts idø'on yide'en n'ane'emy ku meets idø'on ja Dios ja mdsøjkin xmøøgyøxt. <sup>21</sup>Niti pøky idø'on ja Cristo tkamøøt'ajty xjats ja Dios Teety tyimñayide'en ja ttuun sam ja møj pøkyjaa'y yiktuñim, jøts nyikupøjkindit sam ja Dios Teety ttsøky ku ja Cristo møøt n'ejtint.

**6** Jade'ents migu'uktøjk idø'ondi, niduki'iyi niwine'en adøm ndunk'ajtyindi ja Dios yja', n'amidøøpy meets jøts kidi nugo ja Dios y'øy'ajtin xyikwindigøjyidi midi ja tø mduk'ijxyidi midi ja tø mduknijawiyidi. <sup>2</sup>Jabi jade'enxi ja køøm wya'añ ñøkyijxpy:

Ku ja xøøw ja jumøjt tpaajty nmadoow øts ja mji'iyin ja myajxin;  
jøts ku ja yiknitso'ok'ajtin tpaajty winets me nbudøjkiiñ.

Ixyam idø'on ja mxøøw ja mjumøjt tø yja'tni jøts ja myiknitso'ok'ajtin tø tpatni.

<sup>3</sup>Øy øøts idø'on ja ndsinag'yin nyiknaxy jøts øøts jade'en ja ndunkjøøjp nipøn xkada'abaxt.

<sup>4</sup>Jade'enxi øøts idø'on ne'egi nyiknigaxø'økwa'añ ku øøts ja Dios nmiduñ, tuda'aky øøts ngupiky'aty tuki'iyi ja ayo'on; <sup>5</sup>tø øø nyiktsumy nyikwøpy; tø øøts ja jaa'y namay xamuky, møk øøts ja ndunk nyiknaxy kunim øøts ngø' ndeky kya'ukmajada'kni; kawinaak tsuu øøts tø ngamaa'y tø

nga'ity, ayuu øøts kawinaak xøøw tø nyiknaxy. <sup>6</sup>Njujky'ajtingøjxp øøts nyiknigaxi'iky ku øøts ja Dios nmiduñ. Jøts jade'en kyaxi'iky ku øøts ja Dios y'ixpøjkin ka'pxy nnija'wiyi jøts øøts nduda'akyjaa'y'aty. Tø øøts n'øyjaa'y'aty jøts tø øøts ja Espiritu Santo yja' nyiknigaxø'kmi jøts nayide'en øøts ja tsojkin ja pa'ayo'owin øy pøngapøn tø nmø'øy. <sup>7</sup>Ja tiy'ajtin ja janch'ajtin øøts tø nmøøt'aty, jøts ejtp øøts ja Dios ja myøk'ajtin xa'agø'duky xa'axajtuky. Ja ødyu'unin ja tiidyu'unin øøts tø nyiktuñ ku øøts ja Dios yja' tø nyikyø'øyi jøts ku øøts ja y'ayuujk nnitanaa'miyi. <sup>8</sup>Juunjaty øø nyikajxa'aky jøts nay jaayi øøts nyikpagajpxy. Øy øøts jaayi n'ukyiknimadya'aky jøts nay jaayi øøts wenk n'ukyiknimadyaknimi. Ja øøts juunjaty nyiknøjmi ku øøts nugo ndaayi jøts nay jaayi wyangojmidi kuk øøts ja y'øybi tyiiby nngajpxy. <sup>9</sup>Juunjaty øøts ngayik'ejxkapy jøts nay jaayi øøts nyik'ejxkapi; ja øøts ja jaa'y juunjaty ja o'jkin xukpaatwa'añ, jajujky'ajtp øøts idø'on jade'en. Yikastigimøøpy øøts, ka'ap øø n'øøky. <sup>10</sup>Øy øøts njamay njatjy, xondakp øø nnayjawi; ayoobi jaa'y øøts, ja øy'ajtints øøts nyajkpy; øy øøts niti njagamøødi, jade'en øø nnayjawi eyximdand øøts jeexyip tuki'iyi ndyimyøøt'ajtkøjxni.

<sup>11</sup>Meets migu'uktøjkti, tiy'ajtingøjxp meets tø ndamigajpxy; tuki'iyi meets ja ndsojkin ja nba'ayo'owin tø ndamay'aty. <sup>12</sup>Øyimik idø'on wine'enin ngondukt nbøktukt øts



ja ndsojkin øts ja nba'ayo'owin. Meets idø'øn jade'en yjawī ne'egi mdumpy. <sup>13</sup>Sam ja u'nkteety ja myajnk tmigajpxy nayide'en meets nmigajpxwami ku ja mdsojkin ku ja mba'ayo'owin niwine'en xka'ama'at'attit. Tundi nayide'en waani sam øts tø nnajtstuni.

### Adøm nikøjxp ja Dios yjuky'ajtyim

<sup>14</sup>Kidi mjuky'ajtin xyiknaxti møøt pøn tkajanchja'widip ja Dios, jabi nijuunixi kyanamyayidit ja tiidyu'unin møøt ja tundigø'øyin, sam ja kudøø'kx'ajtin møøt ja kugoots'ajtin. <sup>15</sup>¿Sudso dø'øn ja Cristo yja' møøt ñamyayidit ja miku' yja'? ¿Uk sudso ja janchja'wibi jaa'y møøt ñamyigu'ukwa'aniyit pøn midsepwajniyip? <sup>16</sup>Ka'ap ja yjuky'ajtin tyiknaxti tu'ugyi ja Dios Teety møøt ja dios midi kø'øm yiktsajstip. Ka'ap adøm njade'enindi jabi kø'ømxi Dios wyinaañ yide'en:

Pøni ma ja chøønidi jam øts ja nmøøtjuky'attit, jøts pøni midi ja ñøjkxtip ejtp øts ja njamyøøt'attit; øts ja xdios'attip, jøts øts njaa'y ja'adi.

<sup>17</sup>Paty ja yide'en yjaakwaañ:

Nanky'abikyidi, kidi ja kya'øybi xyiktundi; jøts jade'en ngupøktit,

<sup>18</sup>øts meets xteety'atp, jøts øts meets n'u'nk'atp, jade'en idø'øn wya'añ ja Dios Teety.

**7** Jade'ents meets migu'uktøjk idø'øn xnijawidit ku ya'at øy'ajtin ja Dios tø tyiktañ. Ja'agøjxp adøm idø'øn øy tsuj

njuky'ajtin, ka'ap ja nne'kx ka'ap ja n'anmija'win nyik'ejtint pøky agujkp. Dios chø'jkingøjxp adøm idø'øn ja Dios ndamiyojxint ja njuky'ajtin.

### Sa ja Corinti jaa'y tyiktigatsti ja wyinmaa'ñ

<sup>2</sup>iJa'gyukidik øts ndsojkin nba'ayo'owin! Jabi ka'axi meets niti windigø'øyin tø xkapaatti øøts køjxp. Nipøn øø ngawindaay'aty, nipøn øø ngana'ixy. <sup>3</sup>Kidi meets ya'at xja'gyuki ku meets nugo nbøkñipiky, jabi jade'enxi tø nwa'añ jawyeen ku meets ja ndsojkin ja nba'ayo'owin tø ndamiyøxy, jade'en ja tpatni møøt mee ñamyayi njuky'aty jøts møøt mee ñamyayi n'ookt. <sup>4</sup>Njøp'ijxy'ajtpy meets jøts amuum mee ndajotkujk'aty. Øy øøts idø'øn n'ayo'ombaaty janch jotkujk ø nnayjawiya.

<sup>5</sup>Ja'ayip øø nja'jty ya Macedonia, ka'ap øøts ja poo'kxin nmøøt'aty, øy øøts magama jaa'y xmidsepwa'añ jøts øøts ja tsø'øgi nyikmajada'akwa'añ.

<sup>6</sup>Yikjotjimbijtpy ja Dios ja yjaa'y, tøts øøts ja xyikjotjimbity ku ja Tiro tø yja'aty. <sup>7</sup>Kidi ja'ayip øø nugo ndyimdyajotkujk'ajtpy ku ja yam tø yja'aty, jabi ja'axi øø nayide'en ndajotkujk'ajtpy ku meets ja nekim mnimadya'akyyi mjantyaxondajkip meets ja'. Jade'en øøts ja xamimadya'aky ku meets xjapaatwa'añ xja'ejxwa'añ jøts nayide'en tnigajpxmi ku meets xajotmay'øøky. Jotkujk øts idø'øn nnayjawiya ku meets xja'myech.

<sup>8</sup>Øy ja nøky tø mja'atsyikjotmaadyøkiyidi

midi meets øjts ndaniguexy, ka' øts ja ixyam sa n'ukja'wiñi. Njanch'ayojiyii'nimts øts idø'on ja jawyeen, ku øts n'ijxy ku øts nnijawi ku meets ja nøky yikxon ja jotmay tø mduktatøkiyidi tøts idø'on ja jade'en y'ukjajtkøjy sa n'ukjatka'am. <sup>9</sup>Jotkujk øts ixyam nnayjawiyi jøts kidi ja'ajip øts ndajotkujk'ajtpy ku meets ja jotmay møk'ampy tø m'atspaadyiyi, jabi ja'axi ø ndajotkujk'ajtpy ku meets ja mdsinaa'yin tø xyiktigach sam idø'on pyaat'aty. Tøxi dø'on xmidanidi ja jotmay'øøgyi sa ja Dios ttsøky sa Dios tkupiky. Jøts ku øøts ja nøky jade'en tø nguexy kidi ka'øy adøtspip øøts, kidi ayo'onip meets ja mdukpaatwajniyip. <sup>10</sup>Ja ayo'on midi tuda'aky yikupøjkp sam ja Dios ttsøky'aty, yiktigachp ja tsinaa'yin ja' jøts jade'en yikpaaty ja yiknitso'ok'ajtin. Pøn tkajanchja'widip ja Dios wenk ja tjawidi ja ayo'on jøts ja y'anmija'win tyikudigøydi. <sup>11</sup>Øy meets ja ngajpxy tø m'atsyikjotmaadyøkiyidi, tuda'aky meets ja tø xkupiky sam ja Dios ttsøky'aty. iEjxtits inet ku ja mdsinaa'yin ne'egi tø tyigatsti! Tø meets ja ngajpxy ne'egi myikwinmaa'mbyaadyiyi jøts jatyi tø xnigajpxti ti dø'on tø xundi; tø m'atsyikjotma'adyidi, tøts nayide'en xtsaachjawidi. Winets meets jatyi xjadyimyigajpxwa'añ jøts nayide'en xiidyunwamidi pøni pøn idø'on tø mmidundigøyidi. Ja' meets idø'on myiknigaxi'kpy ku meets tø mgatundigøy. <sup>12</sup>Ja'agøjxp meets jade'en tø nnijayi ku meets ejtp nja'myech jøts kidi ja'agøjxpip

øts ja nøky tø nguexy ku øts ja'ayi ngajpxwejwa'añ pøn tø tyundigøy uk pøn tø yikmidundigøy. Pø ja'agøjpxpi mee nnijayi jøts ja Dios xuknijawidit mabaat ja mba'ayo'owin myajada'akti ku øø xpa'ayøy. <sup>13</sup>Paty øøts jotkujk nnayjawiyi.

Jawaani jotkujk øø nnayja'wiyi ku ja Tito ya tø yja'aty jøts ku meets ja tø xpudøki jøts ja jotkujk tyiknaxt. <sup>14</sup>Ka'ap ø nugo tø nwindaaayi ja Tito ku meets øy tø mjaa'y'aty samdam øts ja jawyeen ndamimadyaajky. Ka'ap øts ja n'ayuujk nugo tø xyiktsø'ødyuñ, tiy ja tø pyidsimy. <sup>15</sup>Jabi mdsojkipxi meets ja ne'egi ixyam jawaani møj ku meets ja tuki'iyi tø xpadunguixy pøni ti jam mda'ana'amiyidip, jøts ku meets ja øy tuda'aky tø xwindsø'øgi. <sup>16</sup>Ka' xnijawidi mabaat øts nxondaajkin yja'aty ku mee nnijawi ku adøm øy tsuj nnayja'gyukiyindi.

#### Ku ja Pablo pudøjkin t'amidøy jøts yiktabudøkidit ja ayooobi jaa'dyi

**8** Ixyam meets migu'uktøjk nduknijawiywa'añdi mabaat idø'on ja Dios y'øy'ajtin tø pyudøkiyidi ja Macedoniit janchja'wibidi. <sup>2</sup>Øy ja sagasa tjamøjatti øyi myeeñ øyi pyikta'aky yjaga'etti may, jotkujk ja tø tyakojti ja pudøjkin jade'en samdam ja møj kumeñ jaa'dyi. <sup>3</sup>Tø ndyimy'ixy tø ndyimñijawi mabaat idø'on tø tyakti ja pudøjkin øy ja niti yjaga'uktaa'nxiniyidi. <sup>4</sup>Møk øøts ja tø x'amidøy, tyimdyanuu'kxaktip idø'on jøts pyudøjkin ja yikupøktit midi yiktabudøkiwyandip ja jaa'y midi nayide'en tjanchja'widip

ja Dios. <sup>5</sup>Jinaxy idø'øn ja ne'egi tø ttundi yam øts ja jade'en ngajøp'ijxy'aty, jabi jawyeenxi ja Dios ñadyamiyojxiyidi jøtsnim øøts ja xpaduñ samdam idø'øn ja Dios ttanibiktaagi. <sup>6</sup>Ja'agøjxp øøts idø'øn ja Tito ndaguwani jøts pudøjkin ja jam tjaakyikmukojt midi mee kø'øm mdsojkingøjxp myakwampy midi ja jam tø t'ukyikmuktsøñ. <sup>7</sup>Agajpxy mee mbidsimy øy yjadyimysudso'ambyi: møk meets ja ajot'ajtin xmøødi møøt ja winmaa'ñ sudso yikxon xyaktit ja Dios y'ixpøjkin, jøts mwijy meets, wa'ats xjatti wa'ats xnijawidi, jøts møk mee xtsøky møk mee xpa'ayøy niwine'en øø nyam'aty. Patyxi øø nwa'añ ku meets agajpxy mbidsømit nayide'en ku ja pudøjkin xyaktit.

<sup>8</sup>Ka' meets ya'at ndyimdyaguwani, ja' øøts idø'øn ñanky'ejxwajnip sa dø'øn ja Macedoniit jaa'y ja chojkindi pya'ayo'owindi jøts yiknijawit nayide'en jøts ku meets ja mdsojkin ja mba'ayo'owin tyiyi yjanchi. <sup>9</sup>Mnija'widipxi jøts ku ja nwindson'ajtim Jesucristo ja y'øy'ajtin jadine'en tyikmajada'aky, jøts møk ja tsojkin møk ja pa'ayo'owin tmøøt'aty ku ja mguwanjatiyidi ja'agøjxp ku ja mdsøkyidi mba'ayøyidi, jabi jotkujkxi ja y'ijty tyiknaxy møøt ja Dios Teety. Adømgøjxp ñanky'ayodøjkiyi jøts ja øy'ajtin jade'en nbaajtant Cristo køjxp.

<sup>10</sup>Meets m'øy'ajtingøjxp øts idø'øn yide'en nwa'añ ku meets junkti'jyip ja pudøjkin xyikmuk'okwa'añ janch pe'tpy janch yiijy. <sup>11</sup>Nayide'ents idø'øn ixyam xu'undit sam tø

xyiktso'onda'akti. Tuki'iyi ja m'aaw ja mjoojt xpikta'aktit kunim ja xyik'abaadidit, pøni mabaat nidu'uk nidu'uk myajada'akti. <sup>12</sup>Jabi ka'axi ja Dios tuki'iyi t'amidooguixy, ja'axi ja y'ijxy mabaat idø'øn nidu'uk nidu'uk chojkingøjxp tyaky.

<sup>13</sup>Ka'ap jade'en xja'gyukidit ku meets ja mmigu'uk nduku'ayowidyøkiwya'andi; <sup>14</sup>jabi nixem niyamxi dø'øn tuknax nmøøt'ajtindit ja pikta'aky. Ixam meets xmøøt'aty midi yø ka'ejtxidip, ja'atp ja xøow ja jumøjt jøts ku meets yø wyinaty mga'ejtximiyidi winets yø mmø'ømyiyidit. Jøts jade'en ñi'awich'att, <sup>15</sup>sam ja Dios kyajpxy wya'añ: "Pøn tyumøøt'ajtkijxy ka'ap ja tø wyinda'anxiyi; jøts pønts waani tmøøt'ajtp, tuki'iyi ja tø ttapatkixy."

### Tito jøts ja myigu'uktøjkti

<sup>16</sup>Ja' øts Dios ndamøja'wip ku meets ja Tito nayide'en mba'ayøyi sam øts. <sup>17</sup>Tø ja tjanch'øyjawi ku meets ja ndanigaxwa'añ, tøyim ja jeexyip ttuñ kø'ømmdsojkingøjxp jabi mjanch'ejxwajnipxi meets ja'.

<sup>18</sup>Ixyamts ja Tito møøt nguexy tu'uk adøm nmigu'ukti midi øy yiknimadyakp ma jaty ja janchja'wibi jaa'y ñamyukyidi, jade'en ja yiknijawi ku ja øy tiy tñigajpxy ja nitsoojkin ayuujk pøni ma jaty ja tø wyidity. <sup>19</sup>Kø'ømyi ja Macedoniit jaa'y tø twi'ejxti jøts øøts yø møøt ndu'unt jøts øøts yø møøt njaakyikmukojt ja pudøjkin. Ja'agøjxp øøts yø'øbi tunk nduñ jøts ja nwindson'ajtim jade'en yiktawindsø'øgit jøts jade'en meets xyiknigaxø'økt ja mdsojkin ja

mba'ayo'owin. <sup>20</sup>Ja nabyagajpxi d'ø'n kayiktsojpk ku øøts ya'at pudøjkin nyikmuky. <sup>21</sup>Paty øøts niti taay ngayiktuñ øy øøts yø nminaxt Dios wyingujkp jøts jaa'y wyindump.

<sup>22</sup>Nayide'en øøts ixyam ndamigaxi jadu'uk adøm nmigu'uk midi ja Dios yja' øy tsuj pyaduujnip jøts ku meets ja nayide'en mdajotkujk'ajtmiiyi. <sup>23</sup>Ku pøn jam tyiknidøøwit ti d'ø'n ja Tito tyumpy, jade'en x'adsojimbettit jøts ku øts yø nmigu'ugi, øts nmøøtumbi yø', øøts id'ø'n ndumpy ja pudøjkin pøni pøn tsojpk ja Dios. Jøts pøni yiknidøø'jimyidip ti yø tyundip yø jadu'ukpi migu'ukti, jade'en x'adsojimbettit ku janchja'wibitøjk yø tø kyexyidi jøts ku ja Cristo yø jade'en twindsø'ogidi. <sup>24</sup>Paty ø nwa'añ ku jam mbaadiyidit yikxon xuk'ejxtit xuknijawidit sa meets ja tsojkin sa meets ja pa'ayo'owin xmøø'taty jøts ñigaxø'økt jade'en jadits meets ndajotkujk'aty.

**Ku ja Pablo tnigajpxy sudso ja pudøjkin yjaakmukt**

**9** Ka' pyaat'atyiyi ku meets ya'atpi winmaa'ñ jeexyip ndanijayi, <sup>2</sup>jabi nnija'wiñipxi øts ku meets ja pudøjkin jatyi xyakøjy. Jotkujk øts id'ø'n ja Macedoniit jaa'y nnimay'etti ku meets junkti'jyip ja pudøjkin xyakwani jøts jade'en namay ttunwamidi sa me tø xunjøpi. <sup>3</sup>Ja'agøjxp øts ya'at migu'uktøjk ngaxti jøts mdukja'myatsidit ku ja pudøjkin xyik'awejxtit. Jøts øts jade'en ja n'ayuujk tyø'øt

sam øts yø tø ndamimadya'akti jawyeen. <sup>4</sup>Ja kuts jotmøn ja Macedoniit jaa'y nmøøtnøjkxt jøts ja jam m'atspaadidit yam meets jam wyinaty niti xka'awixy. Tsø'ødyuñimts ja tya'ant ku wyinaty jade'en yjaty yam meets øy tø n'uknimadya'aky. ¿Jaa kidi meets ja tsø'ødyu'unin jawaani mõj mbaadiyit? <sup>5</sup>Yide'ents øts yjawi ne'egi ndanibiktaagi jawyeen ya'at jaa'y m'ats'ejxidit jøts jade'en mjaakpudøjkigyoyiyidit jøts kya'pxt ja pudøjkin midi meets tø xni'adsowi. Jøts jade'en wyinaty jam mgøømdsojkin xyiknigaxø'økti jøts ka' mwa'andit ku øøts nugo ndyimyajada'aky.

<sup>6</sup>Ejtp ya'at xja'myats'ettit: Pøn waani nepp, nayi waani ja tpiky ja pyikta'aky; jøts pøn may nepp, nayi may ja pyikta'aky ja wyimbijty. <sup>7</sup>Kø'ømdsøky'ampy id'ø'n ja pudøjkin xyaktit. Kidi adsep'amip ja xu'undit jabi tsojkpxi Dios ja' pøn xondaajkingøjxp tyajkp ja pyudøjkin. <sup>8</sup>Maajyip ja Dios jøts tkaxt køx kida'ak ja kunuu'kxin jøts jade'en xmøø'tat'ettit pøni ti tsojkip, jøts nayide'en ja mmigu'uk xjaaktanipaattit tuki'iyi ja pudøjkin. <sup>9</sup>Pø yide'enxi ja Dios kyajpxy wya'añ:

Pøn ttabajaa'ñaxp ja ayo'on, pyudøjkp ja ayooobi jaa'y ja', jøts ja y'øyjaa'y'ajtk niwindem ja kyagugøxi.

<sup>10</sup>Abaadi ja Dios tyaky ja jujky'ajtin jøts adøm jade'en tuki'iyi nmøø'tajtkøjxint jøts ja nmigu'uk nayide'en ja pudøjkin ndanipaajtint. <sup>11</sup>Jøts meets nayide'en køx kida'ak xmøø'tattit

ja øy'ajtin jøts øy pøngapøn xmo'odit. Ja pudøjkin midit meets xaniğaxip, ja Dios ja tyamøjawidip tyagunuu'kxjawidip ku ja wyinaty yiktanipaatti. <sup>12</sup>Kidi ja'ayip adøm ja nugo ndabudøkiwya'añindip midit ja ka'ejtxidip, jabi ja'axi nayide'en yiktump jøts ja Dios ja tkajxak'ettit. <sup>13</sup>Ja'agøjxp ja Dios ja ttamøjawidit ku meets tiy ka'pxy xmimadowdi ja Cristo y'øgyajpxy y'ømyadya'aky sam nayide'en ttamøjawidit ttagunuu'kxjawidit pøn jaty wyinaty paajtmiyidip ja pudøjkin. <sup>14</sup>Jøts meets ja nay jaayi mgugajpxajkmiyidit jabi tøxi meets ja Dios ja myøj'øy'ajtin wyinaty xyikniğaxø'økti. <sup>15</sup>iJanch møj ja Dios ku ja møj kunuu'kxin tø xmø'øyim! iKa'ap aaw ayuujk yikpaaty sudso ja nnimadyajkin!

Sa ja Pablo yikutuky ku ja nwindson'ajtim tkudani

**10** Tyimgyø'øm øts idø'øn nnuu'kxa'aky nayide'en sam ja Cristo jeexyip kø'øm ttuñ. Jade'en ja kajpxy yø'øy kuk meets nnijayi, tyimy'ap meets ja nøky ndaniğaxi, jøts ka'ap øts nayide'en njaa'y'aty ku øts ja jaa'y møøt nnabyaadyi, ja tsø'øgik øts nyikmajadakpy. <sup>2</sup>Paty nwa'añ, ku mee wyinaty n'ats'ixy jøts ø xkayik'ambøktit ku øts ja jamiy n'uknibidø'knit pøn ja y'aaw ttakajpxtip ku øts ngø'ømwinmaa'ñ nyiktuñ sam øy pøn jaa'yin. Ka'ap ø pøn ndsø'øgi pøni jade'en ja ttsokti. <sup>3</sup>Janch tiy idø'øn ku øts nbojkipitumbijaa'yi, ka'apts øts mibaat ja pøky x'ana'amt. Ja Diosxi øts ja yja' xuu'møy'ejtp. <sup>4</sup>Ja

nmøk'ajtin øøts, ka'ap ja pøky agujkpy pyidsimy, Dios wyingujkp ja chøøn midit tyikudigøøpy pøn ja Jesucristo møøt kyanamyayi. <sup>5</sup>Jade'ents idø'øn, nyikudigøøpy øøts ja katiiby kajpxy midit nugo nankmyøjtøjkiyip ku ja Dios ja yja' tkananky'ejxwajniyi. Jawyeen øøts ja Cristo nduknijawi sa pønjabøn wyinmay jøts ja tu'ugyi ja yja' tpaduujnidit pøni yikutujkpy ja jade'en. <sup>6</sup>Ndiidyu'ump øøts pøn ka'pxy tkabadu'undip ya'atpi ana'amìn ku meets wyinaty tø xpadunguixy jawyeen.

<sup>7</sup>Ku mee x'ijxy ku ndsø'øgi ka' xnijawidi sam ndyimyjaa'y'aty. Pønjabøn wya'andi ku ja Cristo yja'atyidi, nayide'en idø'øn tñijawidit ku øøts ja Cristo xja'ajtmi. <sup>8</sup>Wan meets jam winaagin mwa'añ ku øts ja nwindson'ajtim kyutujk nugo ndyimdyamajada'aky, niti ngapøkyjawi jabi kø'ømxi ja nwindson'ajtim tyajky ja kyutujk jøts meets jade'en ja mjanchja'win myøjit, jøts ka'ap meets ja mgudigø'øyin n'ixajyi jade'engøjxp. <sup>9</sup>Kidi xja'gyukidi ku meets yø nøky nugo nda'adsø'øgiwya'añ. <sup>10</sup>Jade'en ja kajpxy yø'øy ku tyimy'ap ja n'ayuujk nguexy jøts ja jaayi kø'øm nga'uknitanaañ, ka'abik øts øy tsuj ja madyajkin nmøødi. <sup>11</sup>Pøn idø'øn yide'en ja ayuujk tyikyø'øpy nayide'en idø'øn ja tñijawidit ku øøts nayide'en ndyimyjaa'y'att meets windump sam øøts n'ayuujk nguexy jagam.

<sup>12</sup>Ka'ap øø nnay'a'ejxiyi jøts øø kø'øm nnay'agajpxiyit sam jam muum winaagin ttundi. Ja kaja'gyukin ja yikmajadajktip

ku ja nixem niyam kə'əm  
 yjanch'uknay'agajpxyidi. <sup>13</sup>Nijuuni  
 øøts ja kutujk ngayiktuñ midi øø  
 ngamøøt'ajtpy. Ja Dios øøts idø'on  
 xuknija'wip mabaat idø'on ja  
 tunkjøøjp yja'aty, jøts nay ja' øøts  
 tø xuu'mø'øy kə'əm ku meets jam  
 tø n'atsnija'aty Corinto. <sup>14</sup>Ku øø  
 nwa'añ ku øøts ja kutujk nmøøt'aty  
 jøts meets n'ana'amt, ka'ap øøts  
 ngø'əm ja' nyiktuñ, pø jade'en ja  
 jeexyip yjaty kuk øøts jam jawyeen  
 jeexyip tø nga'ats'øch. Jabi meetsxi  
 jawyeen ndanija'jt ja øgyajpxy ja  
 ømyadya'aky sa ja Cristo y'øy'ajtin  
 xukpaajtint. <sup>15</sup>Ka'ap øø ndsøky jøts  
 øøts nugo nnadya'agajpxit ja wenk  
 jaa'y tyunk ja kajpxwejin midi tø  
 myikmo'odi. N'awixy'ajtpy øøts  
 ku meets ja mjanchja'win winjaa  
 windsojk myøjit myayit mabaat  
 idø'on pyaat'aty jøts mabaat øøts  
 nayide'en nmajada'aky ku øøts  
 jam ndu'unt ma meets jam. <sup>16</sup>Xjats  
 øøts jade'en ngajpxwa'kxt ja  
 nitsoojkin ayuujk abiky'et abikyajp  
 meets mjixkø'əm, jøts nijuuni øøts  
 nganadya'agajpxit ja wenk jaa'y  
 y'ixpøjkin.

<sup>17</sup>Pøni jaa pøn ñay'agajpxwa'añi  
 kə'əm, ka'ap jade'en pyaat'atyiyi,  
 ja Dios idø'on ja y'øy'ajtin ja  
 ne'egi ja'ayi y'agajpxip. <sup>18</sup>Ka'ap  
 y'øbyidsimy ja jaa'y pøn kə'əm  
 nay'agajpxiyip, ja'ats ne'egi  
 øbyidsømp pøn ja nwindson'ajtim  
 t'øyja'wip jøts ja t'agajpxy.

**Pablo jøts pøn ñadyijyi  
 nañikajpxidip Jesús kyudanaabyi**

**11** Meets migu'uktøjkti, wan  
 meets mwə'ant ku nugo  
 mo'tpin nmadya'aky, ja'gyuki

meets waani wan øts ngajpxy  
 t'ukyiknaxy midi n'am njotp  
 nmøøt'ajtpy. <sup>2</sup>Øy mee n'ama'at'aty  
 ja Dios øts idø'on jade'en kə'əm  
 xyik'adøts; jabi tøxi ja Cristo yja'  
 tu'ugyi ndukpabøjkidi jøts ku meets  
 ja ndawinguwawiwya'añ. Wa'ats  
 meets jam nyiknøjkxwa'añ, sam  
 pøn ja pøky tkidyimy'ijxy'ajtipnim.  
<sup>3</sup>Jade'en sam ja Eva ja tsa'añ  
 wyindaayiyøø, wan meets yjawi  
 nayide'en myikwindaay'atwa'añ  
 jøts mwinmaa'ñ tyigatstt jøts  
 jade'en mga'uknadyamiyojxniyidit  
 ja Cristo. <sup>4</sup>Jam pøn ja Cristo  
 y'ixpøjkin wenk tnigajpxip, ka'ap  
 nayide'en sam øøts nnigajpxy;  
 jøts meets ja Espiritu Santo yja'  
 nayide'en wenk xnija'wiyi, tigach  
 meets ja yiknitsokpi ayuujk  
 xnijawidi, ka'ap nayide'en sam  
 øø nnigajpxy. <sup>5</sup>Pøn jade'en  
 myikwinmaa'nmya'jt tidip ka'ap  
 øts ja mabaat xyik'amutskidi øy  
 ja nugo ñadyijyi yjanañikajpxyidi  
 ja Jesús myøjkudanaabyi. <sup>6</sup>Øy øts  
 n'aaw n'ayuujk øy tsuj ngamøøt'aty,  
 ka'ap øts nwinmaa'ñ ñayide'eni. Tø  
 øøts yø nyiknigaxø'kni ku meets o  
 tigati tø ndabudøki.

<sup>7</sup>¿Tø øts idø'on ndundigøy ndejint  
 ku meets jadi'iñi tø ndukmadøy  
 ja nitsoojkin ayuujk ku ni tu'uk  
 centabi tø nganibiky, jøts øts  
 jade'en ayo'ijxyim njaty nugo ku  
 mee xpiky ja øy'ajtin? <sup>8</sup>Wenkpi  
 janchja'wibitøjk øts ja myeeñ  
 tø ngupøjkidi ku meets janch  
 nduknijawiwya'añ ja øy'ajtin.  
<sup>9</sup>Jøts ku øts jam n'uknajxy ma  
 meets jam, ka'ap øts jam ojts pøn  
 nyik'ayøy pøni ti jaty ø xka'ejtxip;  
 jabi ja nmigu'ukxi øts ojts xujnidi

ja may'ajt pøn tso'ondip jam Macedonia. Jade'ents mee ka' nyikjotkixy, jøts ka'ayim meets nugo nyikjotkøxwa'añ, jade'eñim ø nyiknaxt sayim ø nyiknaxy. <sup>10</sup>Nayide'en sam øts ja Cristo tyiy'ajtin njanchja'wiyi nayide'en ø njawi ku meets nnøjmi, ku jam Acayi y'etjotp ni tu'uk ja jaa'y jam, pøn ø xuk'ixmatsp ja'abi xondaajkin ku øts Dios yja' nnigajpxiyi. <sup>11</sup>¿Jadits øts n'ayuujk jade'en nyikwa'añ? ¿Ja'agøjxp idø'on ndejint ku meets nga'uktsojknì? Wa'ats ja Dios tnijawi mabaat øts ndsojkin yja'aty meets køjxp.

<sup>12</sup>Jade'eñim øts yø ndunk nyikyø'øy'ett jøts ja kyamøj'attit pøn ñadyijyi nañikajpxidip ku ja nayide'en tyumidi sam øøts. <sup>13</sup>Yø'øbi jaa'dyi nugo yø tyaay'atti ku ja Cristo tkudanidi. <sup>14</sup>Ka'ap yø kumaap nja'wa'ant, jabi kø'ømbaatxi ja mikuwindsøn Satanás ñanky'ijxyiyi ejxindam ja Dios y'ankilis kunuu'kxy. <sup>15</sup>Paty nayide'en yø tyumbi ñanky'ejxmiyi samdam ja øybi tumbi jaa'y. Ja chinaa'yin ja yiktatiidyu'undip jade'en sam ja pyaat'atyidi.

**Sa ja Pablo y'ayo'ombaaty  
ku ja Jesús tkudani**

<sup>16</sup>Ixyam mee nnimaagyojmi jøts kidi nugo mwinmaydi jøts ku nmø'øty. Pøni jade'ents xja'gyukidi, wants øts jade'en tmadya'aky jøts øts nadyijyi namyikajxibim nnayjawiyit. <sup>17</sup>Kidi mee mwa'añ ku øts ja nwindson'ajtim jade'en xyikmadya'aky, jabi nugo mo'tpixi øts idø'on, ku njanch'uknay'agajpxiyi. <sup>18</sup>Jaaxi

jaa'y pøn nadyamikajxidip ja ñaxwii'ñit tsinaa'yin, wants ø nayide'en nduknamyikajxmiyi.

<sup>19</sup>Jabi møj ja'gyukipxi meets mjaa'y'aty, patyts meets sa xkatijy pøn mo'tpa'an madyakp.

<sup>20</sup>Ja' mee ne'egi m'øyja'wip pøn jiyujkin myiktuujnidip, pøn mwindaay'ajtidip, pøn mnijuu'nyiyidip, pøn mdekpya'an'ajtidip. Mgupiky'ajttip ja' øy sagasa myiktunidit. <sup>21</sup>iø y øts ixyam nnabyøkyjawiyi ku øts jade'en tø ngajaa'y'aty kudam meets yø' ne'egi jade'en x'øyjawi!

Pøni jaa pøn ap tyimñayjawiyi, xmaapy øts ja', øy øts nayide'en njaa'y'att. <sup>22</sup>¿Ja hebreo ayuujk nadya'agajpxidip? Nnija'wip øts ja nayide'en. ¿Israelit jaa'y ja'adi? Nayide'en øts. ¿Y'apteety'amøj'ajttip ja Abraham ja'? Nayide'en øts ja n'apteety'amøj'ajtmi. <sup>23</sup>¿Jade'en ja wya'andi ku Cristo tmidundi? Jawaani øy øts ja ne'egi nmiduñ, øy øts jade'en ja tsojkin njagamøøt'aty jøts ø nnay'agajpxit kø'øm. Jawaani møk øts ndunk ne'egi tø nyiknigaxi'iky yam yja' ja ka' ne'egi ñigaxø'økti. Tø øts ngu'ayo'ombaadi ja ndunkjøøjp, ne'egi ka'ap ja'adi. Ne'egi jawaani may ojk øts idø'on ja tø nyiktagudsumi, jøts kawinaak ojk øts ja o'jkin tø n'ixy jaayi wingon xwindani. <sup>24</sup>Magoxk ojk øts ja ayo'on tø ngupiky mididi øts nmigugajp israelit jaa'y tø xmø'øy sam ja kyutujk wya'andi ku ee'pxmajk taxujk ojk nyikwøpy. <sup>25</sup>Tigøøk ojk ø tø nyikipwyøpy, jøts tu'uk ojk tø nyiktsaaga'aach. Tigøøk ojk øts ja nbarki tø myejy'okida'aky.

Tu'uk ja xøow tu'uk ja koots nyiknajxy jam mejkyujk'am, ja kipy pyidasi, ja puu' pyidasi øts iiy xjaakyiknøøwinganamp. <sup>26</sup>Jagambaat øts kawinaak ojk tø nwidity jøts jam muum ja møj nøgom xyikjø'øtwa'añ, jøts ja jaa'y muum xwimaatswami. Ngø'øm migugajp paat øts xn'i'adani xuu'adani sam nayide'en y'adøtsmidi ja wenkajp jaa'dyi. Nbatpy ø nayide'en ja ayo'on møj kajpjotp samdam abak etjotp uk jam mejyjotp. Nayide'en øts ja xka'ødyumidi pøn ñadyijyi Jesucristo janchja'wibidi nañikajpxidip. <sup>27</sup>Tø nduñ mabaat øts ja ngø' ja ndeky myajada'aky, øy øts ayo'on ja xadukpaaty; kawinaak ojk ø ngamaa'y nga'ity; ayuu adøøtsi tø nyiknaxy kawinaak ojk; tø ndanaxy ja tep ja xux, ni ja nwet ni ja nnaamy tka'ukpatni.

<sup>28</sup>Øy øts idø'on jade'en ya'atpi ayo'on njapaaty uk midi jatyts njayiknaxpy, møjip mayip øts ja njotmay ku øts ja njotmay'ati jabom jabom pøn jaty tjanchja'widip ja nwindson'ajtim. <sup>29</sup>Pøni jaa pøn ja yjanchja'win kamøj, janch pamaa'yin ø nnayjawiyi. Pøni jaa pøn wenkpi winmaa'ñ tpanøjknidip, møk øts ja n'ayooji, møk øts ja ngudsø'ødyuni jøts øts ja nugo njantya'ambiky. <sup>30</sup>Pøni janchpaat'ajtipts idø'on ja nay'agajpxi ja ngamøk'ajtints ø ne'egi nadya'agajpxip. <sup>31</sup>Ja Dios Teety midi ja nwindson'ajtim Jesucristo tyeety'ajtpy midi paat'ajtiyip xemikøjxp yikmøjawit yikunuu'lkxyjawit, wa'ats ja tnijawi ku øts ejtp ja tyiiby ja yjanchpi

nnigajpxy. <sup>32</sup>Jøts ku øts nnajxy jam Damasco kajpjotp, jam dø'on tu'uk ja windsøn midi tmidump ja yjadu'ukpi møj windsøn Aretas, ja Damaskit windsønts idø'on ojts t'ane'emy ja tyumbitøj k jøts ja tyimyik'adujkøxtit ja tuu' ma jaty ja kajp yiknidøki jøts øts ja xmatstit jøts ø ndyimyiktsu'umt. <sup>33</sup>Ti mats ja Dios xuk'ixmajtsint, jabi jamxi nguejky, ma ja møj pøch jam, midi ja kajp nawidejtip. Øts nmigu'uk xkatstiidyøø mutsk ventani agø'øm kachjotpy. Jade'en øts idø'on ja xkapøktøø.

Sa ja nwindson'ajtim tnanky'ijxyiyi ja yja' Pablo kyumaa'yjotpy

**12** Nnija'wip øts ku niwine'en kyajami ku nnay'agajpxa'ant kø'øm. Meets ukja'gyuki, kuwani øts idø'on nnigajpxt sudso nwindson'ajtim ja yja' tø tnanky'ijxyiyi ku ø kø'øm nnay'ijxyiyi kumaa'yjotpy. <sup>2-3</sup>Ndyimy'ijxy'ajtpy tam øts tu'uk ja jaa'y midi tjanchja'wip ja nwindson'ajtim Jesucristo midik myakmajkts jumøjtjip ojts yikwaanijkxy jap tsajpjotpy. Pø sudso idø'on ja yikwaanijkxy, pø møøt ñe'kx uk nugo y'anmija'wints idø'on ja nøjkxp Dios tu'ugyi tyimy'uknija'wip. Ja'ayi ø nnija'wip <sup>4</sup>ku ojts yikwaanijkxy jap tsajpjotpy ma ojts tmadøy ja kajpxy ja madya'aky midi ka' pøn nugo ñiyiktukmadøy. <sup>5</sup>Ti kanadyamiguexyim idø'on ja yjawi ku øts jade'en sam ja jaa'y, ka'ats øts nnamyikexyiyi pø wanims øts ja ngamøk'ajtin nnadyamikexyiyi. <sup>6</sup>Øyims øts



kø'øm njanchjanañigajpxw'a'ñiyi, pø ka'axi ja ñugo kajpxyi, pø tiy'ajtinxi øts wyinaty nnigajpxpy; ka'ats øts jade'en nduñ jøts kidi pøn nugo wyinmay jøts ku øts ngamaabyi jøts ku øts ka' njade'eni sam pøn yamts øts idø'on ja jade'en ngatuñ sam ja wyinmaydi.

<sup>7</sup>Kawinmaañixi dø'on ja chuji midi øts ja nwindson'ajtim xuk'eix ngumaajyøtpy; jøts øts ja nganadyamikaxiyit, winets nja'wigyejky adsuljky nikøjxp yjajkejky samdam ja kujp xkuu'mint. Ja miku'windson Satanás ja tyunkjøøjp jade'en ñanky'eixip. <sup>8</sup>Tigøøk ojk øts ja nwindson'ajtim ojts njanch'amidøy jøts tyiknaxt ja jajin ja tøø'yin; <sup>9</sup>jøts øts ja nwindson'ajtim yide'en ja'ayi x'adsøy: "Ja ndsojkin ja nba'ayo'owin mets ja'ayi mbudøkiyip; jabi jade'enxi øts nmøk'ajtin ne'egi ñigaxi'iky ku nbudøki pøn ja kyø'øm møk'ajtin ka'ejtxip." Jade'en ja wya'añ. Patyxi øts ja ngamøk'ajtin ndajotkujk'aty, jøts jade'en ja Cristo yja' kyaxø'økt. <sup>10</sup>N'øyja'wip øts ja kamajadajkin, n'øyja'wip øts ku nyikjemnøjmi nyiktenøjmi uk ku tigati xka'ejtxi, uk ku øts Cristo køjxp nyikmi'ambiky ngu'ayo'ombaadi. Ku nnayjawiyi nmøk'ajtin kya'ity jats idø'on nwindson'ajtim ja myøk'ajtin tyik'awa'añ jøts øts ja xuk'ajot'aty.

**Ku ja Pablo tpamay tpadajy ja Corintiit janchja'wibidi**

<sup>11</sup>Janch mo'tpin ø tø nmadya'aky ku kø'øm tø nnay'agajpxyiyi, kø'øm meets tø xyikjaty jabi meetsxik

idø'on jeexyip øy tø xnimadya'aky jøts øts jade'en jeexyip kø'øm tø nganay'agajpxyiyi. ¿Tyimyabaat ja ndejint yja'atti ja wyejin ja kyajin pøn ñadyijyi myøjkudanaabyi'ajtpy ja nwindson'ajtim? Øy øts idø'on mabaat nguidyimyjaty ka'ap øts ja mibaat xwinaxtit. <sup>12</sup>Ku øts ja ndunk tø nyikyø'øy ma meets jam ejtp øts nnanky'ijxyiyi ku øts idø'on ndyimgyudanaabyi'aty ja nwindson'ajtim. Ejxpajtingøjxp milagrikøjxp øts idø'on ja n'ødyunk tø x'ejxidi tø xnija'wiyidi. <sup>13</sup>Pøni mwandipts ku meets ka' tuknax myik'ødyuñ sa øts ja jadu'ukpi n'ødyundi ma jaty ø nwidity ma jaty ø nbaatti n'ejxti ja jadu'ukpi janchja'wibidi, janch idø'on mwa'andi. Xmøøyimdsik meets jam ja kaaky ja maadaajk kuk øts jam n'ats'øjch. iMaa'kxti, kidi xka'øyjawidi ku øts yide'en nwa'añ!

<sup>14</sup>Ixyam nnay'a'eixiyi nnay'abaadiyi ja' ku meets myidigøøk ojk n'ats'eixw'a'añ. Ka'ap meets jam nugo n'atsyik'adujktiwy'a'añ. Jabi ka'axi meets ja mbikta'aky n'ixaajyi, meetsxi dø'on ja m'øy'ajtin ja'ayi n'ixaajyip. Yiknija'wipxi ku ja u'nkteety t'ixa'adi ja meñ ja jingaap midi ja y'u'nk ñidsina'adyip jøts ka'ap ja y'u'nk ne'egi ja tyeety ja yjuky'ajtin tjotmay'attit. <sup>15</sup>Xondaajkin ø nbaatp ku mee ndamiyoxkøxt ja n'aaw ja njoojt mjanchja'wingøjxp; øy meets yjaw i xjagatsøky samdam meets ndsøky. <sup>16</sup>Øy winaagin tjaja'gyukidi ku meets jam nugo ngayik'adujkti, jade'en ja wya'andi ku mee nugo tø nwin'iiñ. <sup>17</sup>¿Tø meets ndejint

ndawindaay'aty ja nmigu'uk pøn jaty meets jam tø ndaniguexy? <sup>18</sup>Kø'øm øts ja Tito n'ane'emy jøts m'ats'ejxidit jøts øts ndamigajxiyii'n̄ jadu'uk adøm nmigu'uk. ¿Tits, mwindaay'ajitidi ja Tito? ¿Ti ka' x'ejxti ku øøts tu'ugyi nwinmaa'n̄ nyikyø'øy jøts tum jade'en øøts n'øyjaa'y'aty?

<sup>19</sup>Wan meets jade'en mwinmay ku øø nugo nnagyubøkiyi. Ka'ap yjade'eni. Wa'ats ja Dios tnijawi ku øøts Cristo køjxp ja ndunk tø nyikyø'øy, jøts meets jade'en ja mjanchja'win myøjit. <sup>20</sup>Ku øts jam wyinaty n'ats'øch jade'en ø njøppjawi ku meets yjawi øy ngapaatt samdam øts ja ndsojkin njadyimyjamøøt'aty. Jøts mee nayide'en xka'øyja'wyimit ja njaa'y'ajtin samdam meets xjadyimyjatsøky'aty, ku meets xka'øyjawit ja kajpxwejin mididi wyinaty nyajkpy. Jabi jade'enxi nnajtsjawit ku meets wyinaty mga'uknamyaa'niyidi nixem niyam, jøts xyikmøjtøjkiñidi ja windii'n̄'ajtk, ja aki, ja tami'ama'at'ajtk, ja nabyagajpxi, sam nayide'en ja namyikajxan jøts nixem niyam mga'uknamyimado'oniyidi. <sup>21</sup>Wan øts ja Dios yjawi nmidsø'odyu'unt ku meets jade'en mjaa'y'ajtni. Wan meets ngujjyit nguyaaxit ku meets wyinaty ne'egi tø xpadøjkiñi ja mga'øchinaa'yin mididi xyambaat mgamajtstu'utwandip. Tum ja axø'økpi tum ja yigaappi m'amp mjotp mmimajadajkidip.

**Xjats ja nøky y'abaadi jøts ja kajpxwejin ja kajpxpoo'kxin y'ukyikyajkni**

**13** Ixyam mee myidigøøk ojk n'ats'ejxwa'añ, jøts ku øts ja

tundigø'øyin jam nyiktiidyøokit pøni pøn jam nugo tyimdyunk'ajtnidip ja pøkyunk, tsokip ja a'ejxnajxpi namajtsk uk nidigøøk pøn ja wa'ats tnimadyakøxtip sa y'ejxi tyiyi. <sup>2</sup>Ku myimajtsk ojk n'ats'øjch n'ana'amdi øts ja' pøn jam yjawi wyinaty pøky agujkpy tyimchinaañidip. Xyamts nwa'añ ku nnøjkxt jadigojk ku nayide'en nbatkojmidit nay ja' pøn ø tø n'ana'amdi, niwine'en øts ja ayo'ejxin ngamøøt'att. Pøni jamidits pøn ja chinaa'yin tyik'ejtnidip pøky agujkpy nayide'en ja pyaat'atyidi jøts tiidyu'unin tyagida'agidit. <sup>3</sup>Jade'ents meets idø'øn xajotkujk'att ku øts ja Cristo xyikmadya'aky jøts meets jade'en mgawa'ant ku ja' kyajotmøjki; jabi ñanky'ejxipts ja myøk'ajtin ma meets jam. <sup>4</sup>Ja kyamøk'ajtin kyu'o'jki kruskøjxp, xemikøjxpts ixyam yjujky'aty Dios Teety myøk'ajtingøjxp. Nayide'en adøm idø'øn ja kajotmøk'ajtin njagyeypyim sam ja yjajty. Ku ja xemikøjxp nmøøtjujky'ajtin ja nwindson'ajtim jade'ents ja Dios Teety tyaky ja møk'ajtin mididi meets ndabudøjkip.

<sup>5</sup>Yikxon meets kø'øm nabyawinmayi, ¿mjanchpadundip idø'øn ja mjanchja'windi? ¿Ja ka' xja'myatsti ku ja Cristo xmøøt'atti? Uk nugo meets idø'øn mnañikajpxyiyi Cristo janchja'wibi. <sup>6</sup>Jade'ents øø nwa'añ jøts meets xnijawit ku mee ka' nugo nwindaa'yi ku øøts ja Cristo yja' nbaduujni. <sup>7</sup>N'amidøøpy øøts ja Dios jøts meets øy mjaa'y'att. Kidi ja'agøjxpip jøts øøts jade'en ja n'ana'amin myøjtøkit. Ja m'øy'ajtinxi øøts

ja'ayi n'ixaapy. Padun meets ja',  
 øy øøts agajpxy njagabidsimy.  
<sup>8</sup>Ka'ap øøts ja møk'ajtin nmøøt'aty  
 jøts øøts nwindson'ajtim ja  
 tyiy'ajtin ngajpxwe'jtít, ja' øøts  
 ndunkjøøjp'ajtpy jøts ja yiknigajpxt  
 tiy ka'pxy. <sup>9</sup>Ndaxonda'akp øøts  
 ku meets ja møk'ajtin xmøøt'att  
 øy øts ja ngutujk njagayiktuñ.  
 Ejtp øøts ja Dios n'amidoo'ett jøts  
 meets ja mjanchja'win jøts meets ja  
 mjujky'ajtin yikxon y'øyit yikxon  
 tyuda'akt. <sup>10</sup>Namga'aním ø ndsøøñ  
 ku meets ya'at nøky ndanigaxi jøts  
 ku meets wyinaty n'ats'ixy ka'ap  
 xjawidit møk ja tiidyu'unin midí  
 ø tø xaguwani ja nwindson'ajtim.  
 Ja'agøjxp øts ja kutujk tø xmø'øy  
 jøts meets ja mjanchja'win myøjít  
 jøts kidi ja'agøjxpip øts ja nmøødi  
 jøts meets ja kudigø'øyin xpaatti.  
<sup>11</sup>Meets migu'uktøjkí, øy meets. Yikxon meets

ndamidsøky xyiknaxtit  
 ja mdsinaa'yín, ixá'adi ja  
 øy'ajtin ja tudá'aky'ajtin,  
 nankyjotkujk'atidi nixem niyam,  
 yikxon mnamyigu'ukwa'anidit  
 yikxon mnamyayidit, jøts  
 jotkujk x'ejxtit. Winets meets  
 ja Dios xemikøjxp mmøøt'etidit  
 midí tyajkp ja jotkujk'ajtin midí  
 tyajkp ja tsojkin ja pa'ayo'owin.  
<sup>12</sup>Nagyajxpoo'kxídi nixem  
 niyam sadam ja Dios ttsøk'aty.  
<sup>13</sup>Niduki'iyi ja janchja'wibídi  
 midí øøts ixyam møøt, nayide'en  
 ja tkaxmidí ja kyajxpoo'kxin.  
<sup>14</sup>Paatti kupøkti ja  
 nwindson'ajtim Jesucristo  
 kyunuu'kxin, nayide'en ja Dios  
 Teety chojkin ja pya'ayo'owin  
 jøts nayide'en ja Espíritu  
 Santo nima mgamajtstu'udidit.  
 Tiigyajpxy idø'øn, jade'en idø'øn  
 yjatt.